

Natingala
ka gid
bala



Natingala ka gid bala...?

Sin-o bala ang naghimo sang adlaw kag kalibutan kag bulan? Sin-o bala ang naghimo sang mga kahoy kag mga sapat, kag sang tanang matahum nga mga pispis kag mga bulak kag mga butang? Ayhan natingala ka gid kon diin ang unang katawhan naghalin. Ang Bibliya, nga amo ang Pulong sang Dios, nagasugid sa aton sa kinaunahan gid nga bersikulo (Genesis 1:1):

“Sa ginsuguran ang Dios nagtuga sang langit kag duta.”



Ining kinaunahan gid nga kapitulo sang Bibliya nagatudlo man sa aton nga ang Dios nagtuga sang kinaunahang duha ka katawhan, ang lalaki (Adan) kag ang iya asawa nga (nakilala subong si Eba). Pinaagi sa sining duha ka katawhan ang bug-os nga katawhan nag-abot. Puwede mo masiling nga si Adan kag Eba amo ang imo pinaka-una-unahan (dugangan pa

gid sing lain pa ka 200 ukon labaw pa sa ‘kinaunahan’) nga mga lolo kag lola.

Ang Dios nagasugid man sa aton dira sa Iya libro (ang Bibliya) nga matarong kag maangayon Siya: “Kay ang Ginoo nga aton Dios matarong sa tanang mga trabaho nga Iya ginahimo” (Daniel 9:14). Ini nagakahulugan nga ang Dios wala gid nakahimo sing sayup sa bisan anong butang. Wala Siya sing sala, kag tanan Niya nga mga paminsaron, mga desisyon, mga paghukum, kag mga aksyon perpekto.

Ano bala ang sala? Ang sala nagasiling sang indi sa Dios. Ang bisan anong butang nga aton ginapaminsar, ukon ginasiling ukon ginahimo, nga wala ginauyonan sang Dios ina sala, bisan pa kon nahibaloan naton ini nga sala ukon wala. Basi mamangkot ka sa imo kaugalingon — nakasala bala ako batok sa Dios? Kon ikaw sa bisan kasan-o nangin mainon, nangakig, nagaaligutgot, nagkutsokutso, nanikal,

naghukum sa isa ka tawo, ukon wala nagmasinulundon sa imo mga ginikanan sa bisan anong pamaagi, niyan nakahimo ka sang kinaugalingong sala. Amo ini ang magamay lamang nga lista sang mga sala, apang may madamo nga iban pa nga mga butang nga aton ginapaminsar, ginasiling, ukon ginahimo nga wala nagustohan sang Dios. Ang Dios naghukum man nga ang kada tawo nga natawo sa sini nga kalibutan isa ka makasasala, gani luwas kon luyag mo magpakigbais sa Dios (indi gid pagkamangin-alamon) ayhan dapat mo batonon nga tama ang Dios — ikaw *isa ka* makasasala.

“Walay bisan sin-o nga matarong, wala bisan isa.” (Mga Taga-Roma 3:10a)

“Kay ang tanan nakasala, kag nawad-an sang himaya sang

Dios.” (Mga Taga-Roma 3:23)

Ini nga mga bersikulo halin sa libro sang Dios nagasugid sa aton nga walay-bisan isa nga maayo gid agud makaangkon sang relasyon sa Dios. Ang Dios perpekto, kag kita mga makasasala, walay ka-sarang nga makasulud sa langit kag mag-angkon sang walay katapusan nga relasyon sa Iya. Ang iban nga katawhan nagasiling — “*nakahibalo ako* nga ang Dios kag ang Iya langit perpekto, apang kon paninguhaan ko gid ayhan nga mangin maayo niyan sigurado nga pasudlon ako sang Dios didto sa langit, *magapangindi bala Siya?*” Ini nagapaathag kon ngaa madamong katawhan ang nahilabot sa relihiyosong mga buhat kag sa maayong mga binuhatan, agud nga mahimo nila ang ila mga kaugalingon nga mabaton didto sa Dios. Ang pagkanangin relihiyoso kag maayo basi sa iban nga

katawhan maayo lantawon, apang ang Dios klaro nga nagapaathag sa aton nga ang pagpaninguha nga mangin maayo agud makasulud sa langit sa gihapon indi gid maayo para sa Iya.

“Kay kita tanan nangin kaangay sang isa nga dimatinlo [kita tanan mga makasasala] kag ang tanan naton matarong nga mga binuhatan [relihiyosong mga trabaho kag maayong mga binuhatan] kaangay sang nadagtaan nga panaton.” (Isaias 64:6)

Karon basi kon magsiling ka: “*Niyan, ano bala ang puwede ko mahimo agud makasulud sa langit?*” Ang sabat wala gid. WALA ka gid sing mahimo agud makasulud sa langit. Apang bisan pa sina, ang Dios nagahigugma gid sa imo, kag gani ginhimo

Niya ang TANAN NGA BUTANG para sa imo, agud nga makasulud ka sa langit agud mangin kaupod Niya sa walay katubtuban.

Gani ano bala ang Iya ginhimo? Ginpadala sang Dios ang Iya Anak, si Jesu-Kristo, halin sa langit pakadto sa kalibutan agud mag-ako sang silot para sa aton mga sala. Ini nagakahulugan nga imbis ikaw ang mag-ako sang silot tungud sang imo kaugalingong mga sala (nga magakahulugan sang walay katapusang silot para sa imo), si Jesus ang nag-ako sang imo bahin, kag nasilotan imbis nga ikaw, didto sa krus. Sa pagkamatuud, si Jesus ang nag-ako sang silot tungud sang mga sala sang tagsa ka tawo sa bug-os katawhan, halin sa kay Adan tubtub sa pinakaulihi gid nga tawo. (Ang Dios nakahibalo sang tanang mga butang, lakip ang palaabuton, gani nakahibalo Siya sa sakto kon ano pa gid nga mga sala ang pagahimoon sang kada isa).

“Ginpilasan Siya tungud sang aton mga paglalis; Ginhanog Siya tungud sang aton mga kalautan; ang silot nga nagdala sang pagpasag-uli sang buut [sa tunga sang Dios kag tawo] nangin ara sa Iya, kag sa Iya mga labod gin-ayo kita.” (Isaias 53:5)

“Kay ang Dios nagapahayag [nagapakita] sang Iya gugma sa aton, nga sang mga makasala pa kita, si Kristo napatay [ginsilotan] subong isa ka halili tungud sa aton.” (Mga Taga-Roma 5:8)

Si Jesus amo lamang ang tawo sa kaysaysayan nga wala gid nagpakasala kag gani Siya lamang ang kwalipikado nga mangin perpektong halad sa aton bahin. Si

Jesu-Kristo pirmi gid nangin Dios, kag sang Siya man nangin tawo [ang “Dios-tawo”] nangin Siya lamang ang aton tagpatunga:

“Kay may isa ka Dios sa kinaiya, kag isa ka tagpatunga sa tunga sang Dios kag katawhan, ang [pinasahi] tawo nga si Kristo Jesus, nga naghatag sang Iya kaugalingon subong ang gawad para sa tanan. . .” (1 Timoteo 2:5–6)

Gani sa ano bala nga pamaagi si Jesus nag-abot agud ilansang sa krus? Ang pag-abot ni Jesus sa kalibutan nahibal-an na sang Hudiyong katawhan sa sulud sang duha ka libo ka tuig. Ang Dios nagpadala sang iya mga mensahero (kon kaisa gintawag nga ‘mga manalagna’), agud magsugid sa katawhan nahanungud sa manug-abot nga Manluluwas (ang ngalan

nga Jesus nagahalin sa isa ka Hebreo nga pulong nga nagakahulugan “Manluluwas”). Ang Dios nagsaad nga ang Manluluwas magaabot agud luwason ang katawhan sa ila mga sala. Ang isa ka manalagna nga gin-ngalanan Isaias nga nagkinabuhi sa Israel sing halos 700 ka tuig sang wala pa ang unang pagkari (ang pag-abot) ni Jesu-Kristo. Si Isaias ginsugo sang Dios nga magsulat sang nagasunud nga mga pulong:

“Pinaagi sa Iya ihibalo ang Isa nga Matarong, ang Akon Alagad, magapakamatarong sang madamo, samtang Siya magabatas sang ila mga kalautan.”
(Isaias 53:11)

Ang iban nga mga tagna nagasiling nga si Jesus matawo pinaagi sa isa ka birhen, nga Siya matawo sa pamilya ni Haring

David, nga Siya matawo sa Bethlehem, nga Siya magapaayo sang masakiton, maghimo sang bungol nga makabati, sang bulag nga makakita, kag magbanhaw sang patay. Mabasa man gani naton ang mga tagna nga nasulat sadtong dugay na sang wala pa natawo si Jesus nga Siya “ilansang sa kahoy” (sa krus), kag sa sina Siya mabanhaw halin sa pagkapatay sa tapos ang tatlo ka adlaw. Ini tanan nga mga tagna, kag sang madamo, madamo pa gid, nangin matuud sa kay Jesu-Kristo. Sang si Jesus 30 anyos na nagsugod Siya sa paghimo sing madamong mga milagro, kag nagaanunsyo nga Siya amo ang Manluluwas kag ang palaabuton nga Hari sang Israel (ang ngalan “Kristo” amo ang ginbadbad halin Hebreo nga pulong “Mesiyas” nga nagahambal nahanungud sa pinili nga Hari sang Dios.) Ang relihiyosong katawhan indi luyag sing men-sahe sang grasya ni Kristo nahanungud

sa kaluwasan, kag nangin maimon kaayo sa Iya tungud kay nangin bantog Siya sa Hudiyong katawhan, madamong nagtoo nga si Jesus amo ang Manluluwas kag Mesiyas nga nasulat sang mga manalagna sa Daan nga Katipan. Niyan ang relihiyosong mga lider nagplano nga patyon si Jesus, kag gani gin-akusahan Siya sing pagpasipala (pagpahuya sa Dios) kag sang pagrebelde (ang pagpanghaylo sing pagpapukan sang gobyerno).

Tungud sining dimatuud nga mga akusasyon batok kay Jesus, Siya dima-katarunganong ginlansang didto sa krus, ang kasami nga porma sang pinakadako nga silot sadto nga mga tinion. Ini nangin bug-os nga parte sang plano sang Dios. Sa sinang labi ka importanteng adlaw sang kasaysayan, ang Dios nga Amay nagpabangud (nagbutang) sang tanang mga sala sang kada tawo sang kalibutan

didto sa lawas ni Jesu-Kristo kag dason ginsilotan Siya tungud sang aton mga sala.

“Kag Siya gid ang Iya Kaugalingon nagdala sang aton mga sala sa Iya lawas didto sa krus, agud nga kita mapatay sa sala kag magkinabuhi sa pagkamatarong, kay pinaagi sa Iya mga pilas gin-ayo kamo. [ginpasag-uli sa Dios].” (1 Pedro 2:24)

“Kag Siya [Jesu-Kristo] amo ang pagpakalma [ang Iya mainantuson nga trabaho didto sa krus nagpakontento sa Dios] tungud sang aton mga sala, kag indi tungud sa aton lamang, kondi tungud sa bug-os kalibutan man.” (1 Juan 2:2)



Sang ang silot natapos na, kag ang tanang mga sala sang kada tawo sa kasaysayan nabayaran na, si Jesus nagsinggit “Natapos na!” kag dason ginduko Niya ang Iya ulo kag *boluntaryo* nga gintugyan ang Iya kalag kag ang Iya espiritu. Sang si Jesus nagsinggit “Natapos na!” Nagatumod Siya sa silot sang tanan naton nga mga sala.

Tungud kay ang mga sala sang ka-libutan nasilotan na, ang perpektong pagkamatarong sang Dios nakontento (napakalma) pinaagi sa sining perpektong halad, kag karon hilway na Siya nga maghatag sang Iya perpektong pagkamatarong sa tanan nga nagtoo sa Iya Anak.

Karon basi kon mamangkot ka: *“Sa ano bala nga pamaagi ang pagtoo lamang kay Jesus makapasulud sa akon didto sa langit?”* Kon maghimo ka sang desisyon nga magtoo kay Jesus, kag magtoo nga ginkuha Niya ang silot tungud sang imo mga sala, ini nagakahulugan nga ikaw nagasalig sa Dios para sa imo pagsulud didto sa langit, kag indi sa pagsalig sa imo kaugalingong maayong mga trabaho. Kon ikaw magdesisyon dira sa imo kalag nga si Jesus amo ang imo Manluluwas, ini ngakahulugan nga gin-untatan mo na ang pagtoo sa imo tawhanong kaayo ang ‘diperpektong pagkamatarong’ (nga para

sa Dios amo ang kaangay sang nadagtaan nga panapton) kag karon ang Dios puwede na makapabangud (makahatag) sa imo sang Iya mismong kaugalingong (perpekto!) pagkamatarong.

“Apang sa isa nga wala nagatrabaho [pinaagi sa pagpaninguha nga maghimo sing maayong mga binuhatan agud mahamuut ang Dios], kondi nagatoo sa Iya nga nagapakamatarong [nagahimo sing tama] sing makasasala, ang iya pagtoo [sa pagtoo kay Ginoong Jesus] ginaisip sa iya subong pagkamatarong.” (Mga Taga-Roma 4:5)

Ang pagtoo kay Jesu-Kristo nagakahulugan nga ang Dios puwede magpakamatarong sa imo, sa lain nga pamulong



ginahimo ka Niya nga ‘tama’ sa Iya mga mata. Subong nga ginpakamatarong nagakahulugan man nga karon ikaw sarang na makaangkon sang walay katapusang relasyon sa Iya didto sa langit, indi tungud sang bisan anong butang nga imo nahimo, kondi tungud kay nagtoo ka sa kon ano ang nahimo sang Dios para sa imo.

“Gani, sanglit nga ginpakamatarong pinaagi sa pagtoo, may paghidait kita upod sa Dios pinaagi sa aton Ginoong Jesu-Kristo.” (Mga Taga-Roma 5:1)

“Siya nga wala nakahibalo sang sala ginhimo Niya nga nanging sala tungud sa aton, agud nga kita mangin pagkamatarong sang Dios sa Iya.” (2 Mga Taga-Corinto 5:21)

Gani ano bala ang matabo kon indi ako magtoo kay Jesu-Kristo? Ang Bibliya klarong nagapahayag nga kon pilion mo nga indi magtoo kay Jesu-Kristo nagakinahanglan ka mag-atubang sa Dios didto sa ‘Paghukum sa Dakong Puti nga Trono.’ Ini nga panghitabo matabo sa katapusan sang kasaysayan sang tawo, sang ang tanang mga kalag sang wala

gid nagtoo kay Jesu-Kristo pagadalhon sa atubangan sang Dios. Pagahukman sila sang Dios subong nga nagsikway sang gugma sang Dios kag sang Iya grasya nga plano nahanungud sang kaluwasan, kag tungud kay wala sila nagaangkon sang mismong kaugalingong perpektong pakamatarong sang Dios, ginakinahanglan sila sentensyahan sang eternidad didto sa Linaw nga Kalayo:

“Kag nakita ko ang mga patay, ang dalagko kag ang magamay, nagatindog sa atubangan sang trono, kag ginbuklad ang mga libro; kag ang isa pa gid ka libro ginbuklad, nga amo ang libro sang kinabuhi....kag kon ang bisan sin-o nga ngalan ang indi makit-an sa Libro sang Kinabuhi [ang tanan nga nagatoo kay Jesu-Kristo ara ang ila ngalan

nga nakaselyo sa Libro sang Kinabuhì], gintambog siya sa linaw nga kalayo.” (Bugna 21:12, 15)

“...ang pagpanghatag sang sensya [silot] sa yadtong wala nakakilala sa Dios kag sa yadtong wala nagasunud sa Ebanghelyo sang aton Ginoong Jesus. Ini magabayad sang silot sang walay katapusang pagkalaglag, malayo sa presensya sang Ginoo kag sa himaya sang Iya gahum.”
(2 Mga Taga-Tesalonica 1:8–9)

Apang bisan pa sina, kon ikaw nagatoo kay Jesu-Kristo subong imo Manluluwas, puwede ka makaangkon sang hingpit nga pagsalig sa mga saad sang Dios nga indi ka gid makadto sa linaw nga kalayo, kondi nga magapuyo ka kaupod sa Iya didto

sa langit sa *walay katubtuban*. May mga ginatos ka mga bersikulo kag mga dalanon dira sa Bibliya nga nagapamatuud sang imo walay katapusang kaluwasan kay Jesu-Kristo. Para sa pila lamang ka mga halimbawa:

“Kay ginhigugma gid sang Dios ang kalibutan sa bagay nga ginhatag Niya ang Iya natawo sa pinasahi nga anak [si Jesu-Kristo natawo sa isa ka birhen, kaupod ang iban pa sang pinasahi nga mga kinaugalian], agud nga ang bisan sin-o nga nagatoo sa Iya indi mawala kondi may kinabuhi nga walay katapusan.” (Juan 3:16)

“Kay tungud sa grasya naluwas kamo pinaagi sa pagtoo, kag ini [kaluwasan] indi sa inyo mga kaugalingon, ini amo

ang dulot sang Dios, indi su-bong resulta sang mga trabaho, agud nga walay bisan sin-o ang magpabugal.” (Mga Taga-Efeso 2:8–9)

“Ang nagatoo sa Anak [Jesu-Kristo] may kinabuhi nga walay katapusan; apang ang wala nagatuman [sa sugo sang Dios nga magtoo sa Anak] indi makakita sang kinabuhi [kinabuhi nga walay katapusan didto sa langit], kondi ang kasingkal sang Dios nagapabilin sa iya.” (Juan 3:36)

“[Si Jesus nagsiling] Ako amo ang dalan, kag ang kamatuuran, kag ang kinabuhi, walay naga-abot didto sa Amay kondi pinaagi sa Akon.” (Juan 14:6)

“Kag walay kaluwasan sa bisan kay sin-o nga iban; kay walay iban pa nga ngalan sa idalum sang langit nga ginhatag sa mga tawo paagi sa diin maluwas kita.”
(Mga Binuhatan 4:12)

“Kay kamo tanan mga anak sang Dios pinaagi sa pagtoo kay Kristo Jesus.” (Mga Taga-Galacia 3:26)
“Wala na karon sing silot sa yadtong ara kay Kristo Jesus.”
(Mga Taga-Roma 8:1)

“Magtoo kay Ginoong Jesus, kag maluwas ka.” (Mga Binuhatan 16:31a)

KUDLIT TALANDAAN

KUDLIT TALANDAAN

